

四庫全書

集部

欽定四庫全書

集部
雁門集卷一

詳校官監察御史臣曹錫寶

中書臣劉源溥覆勘

總校官編修臣王燕緒

校對官中書臣陸 湘

謄錄監生臣張裕孚

欽定四庫全書

集部五

雁門集

別集類四元

提要

臣等謹案雁門集三卷集外詩一卷元薩都

拉撰

案薩都拉原作薩都刺今改正

薩都拉字天錫號直齋

其祖曰薩拉布哈

案薩拉布哈原作思蘭不花今改正

父曰傲

拉齊

案傲拉齊原作阿魯赤今改正

以世勲鎮雲代居于雁

門故世稱雁門薩都拉實蒙古人也舊本有

干文傳序稱薩都拉者譯言濟善也

葉薩都拉蒙古

語結親也此云濟善疑文傳以不諳譯語致誤今姑仍原文而附訂于此則本以

蒙古之語連三字為名而集中溪行中秋玩月詩乃自稱為薩氏子殊不可解又孔齊至正直記載薩都拉本朱姓非傲拉齊所生其說不知何據豈本非蒙古之人故不諳蒙古之語竟誤執名為姓耶疑以傳疑闕所不知可矣據所自序稱始以進士入官為京口錄

事長南行臺辟為掾繼而御史臺奏為燕南
架閣官遷閩海廉訪知事進河北廉訪經歷
干文傳序則稱其登泰定丁卯第應奉翰林
文字除燕南經歷陞侍御史于南臺以彈劾
權貴左遷鎮江錄事宣差後陟官閩憲幕與
自序稍有不同然自序當得其實也虞集作
傳若金詩序稱進士薩天錫最長于情流麗
清婉今讀其集信然楊瑀山居新話嘗辨其

宮詞中紫衣小隊諸語及今日春日詩中飲
馬御溝之句為不諳國制其說良允然驪山
詩內誤詠荔枝亦何傷杜牧之詩格乎集本
八卷世罕流傳毛晉得別本刊之併為三卷
後得荻邇王氏舊本乃以此本未載者別為
集外詩一卷而其集復完其中城東觀杏花
一詩今載道園學古錄中顯為誤入則編類
亦未甚確然八卷之本今不可得故姑仍以

此本著錄晉跋又稱尚有無題七言八句百
首別為一集惜其未見今距晉又百餘載其
存佚益不可知矣乾隆四十六年十月恭校
上

總纂官

臣紀昀

臣陸錫熊

臣孫士毅

總校官

臣

陸費墀

欽定四庫全書

提要

欽定四庫全書

雁門集卷一

元 薩都拉 撰

過池陽有懷唐李翰林

我思李太白有如雲中龍垂光紫皇案御筆生青紅羣
臣不敢視射目目盡盲脫靴手污蟻蹴踏將軍雄沉香
走白兔玉環失顏容春風不成雨殿閣懸妖虹長嘯拂
紫髯手撚青芙蓉掛席千萬里遨遊江之東濯足五

湖水掛巾九華峰放舟玉鏡潭弄月秋浦中羈懷正浩蕩
行樂未及終白石爛齒齒韶裘淚濛濛神光走霹靂水
底鞭雷公采石波浪惡青山雲霧重我有一斗酒和淚
灑天風

題焦山方丈壁

江風入霜林寒葉下疎雨蕭蕭復蕭蕭可聽不可數山
僧亦好奇呼童掃行路到處覓秋聲肩輿入山去

送吳寅甫之揚州

青楊吹白花銀魚跳碧藻落日上江船二月淮南道渺
渺春水涯悠悠雲樹杪安得快剪刀江頭剪芳草

秋日病起池上

顧茲林塘幽消此閒日永飄風辭萍蹤落葉散魚影天
池風露涼秋深藕花冷有懷無與言獨立心自省

題潭州劉氏姊妹二孀貞節

雙藤本同根長大附高樹樹倒何所依不離樹根土劉
家好姊妹嫁作儒家婦儒生逝不返姊妹何所去憶昔

嫁夫時各願以偕老今日無所歸骨肉自相保一爐鑄
兩鏡懸置東西牕牕前主人去兩鏡復一雙哀哉哀哉
劉二孀

早發黃河即事

晨牽大河上曙色滿船頭依依樹林出慘慘煙霧收村
墟雜雞犬門巷出羊牛炊煙動茅屋秋稻上壠邱嘗新
未及試官租急徵求兩河水平堤夜有盜賊憂長安里
中兒生長不識愁朝馳五花馬暮脫千金裘鬪雞五坊

市酣歌最高樓繡被夜中酒玉人坐更籌豈知農家子
力穡望有秋短褐常不充糲食常不周醜婦有子女鳴機
事耕疇上以充國賦下以祀松楸去年築河防驅夫如
驅囚人家廢耕織嗷嗷齊東州飢餓半欲死驅之長河
流河源天上來趨下性所由古人有善備鄙夫無良謀
我歌兩岸曲庶達公與侯淒風振枯槁短髮涼飈飈

寄朱舜咨王伯循了即休

元統二年秋八月僕與淮東憲副朱舜咨廣東憲僉

王伯循會于瓜州江風山月亭上過金山登妙高臺
飲酒賦詩京口鶴林寺僧了即休風雨渡江贈別少
年遊詞即休既城去舜咨伯循留廣陵僕獨涉淮過
河北人生聚散信如雲萍倒指歲餘舊遊如夢向時
舜咨有雨過江色淨五字天趣妙發未克竟篇茲以
一字為一韻賦詩寄上舜咨伯循二前輩鶴林主者
了上人

木落淮南秋蘭橈泊江渚把酒三人同江亭看飛雨雨

過江色淨妙景發天趣歷歷江南山一一青可數

又

大江湧金山穩若青蓮座山下有龍宮見水不敢唾江
山萬古同日月片帆過把酒妙高臺狂歌醉相和

又

飄飄鶴林僧布襪青鞋雙長江飛鉢渡碧海魚龍幢遠
來作偈別楚雨鳴秋牕振錫獨歸去天花飛滿江

又

微茫揚子橋細雨濕秋色小艇載吳姬搖搖語相接風
起布帆高一往不可得夜宿廣陵城吹簫照明月

又

霜高木葉空江清水花淨離懷江水深楚女曉粧靚按
拍聽歌聲點飭行酒令白露滿衣裳迴野垂斗柄

宿烏石驛

雲起烏石峰雨灑紫溪嶺孤館如山深愁人覺宵永燈
花剪復開風竹亂不整清晨渡閩關南斗落衣領好寫

度關詩點筆題石笋

度閩關

曉度分水嶺身在雲霧中手如天上捫聲落山下風雷
霆走澗壑神人過虛空頃刻開萬象赤烏飛嶺東白雲
下千峰盡日懷袖裏振衣度閩關洒作山水下仰登天
有梯俯視井無底古來守關人盡作山下鬼寒食百草
青春風吹不起

度嶺輿至崇安命棹建溪

人生天地間馳馬歷大塊行樂須及時流光逝難再役
役功名徒歷歷山水邁偉哉東南區奇險閩粵最車書
四海同風氣一嶺界肩輿度層雲手棹下急瀨四山抱
迴流環合如束帶玉井蓮葉漂仰面天作蓋條地丹峰
前却在紫嶺背微陰間雲霧疎雨洒杉櫓深林樵牧歸
落日山鬼會雪瀑掛水簾林風奏天籟石梯架伸巖往
往遺骨在瑤草石上生丹藥市曹賣巍巍考亭祠過客
祠下拜溪水自成文上接洙泗派喚渡雲門僧貌古清

可愛手把青松枝
跌坐溪石待懸崖
虹棧危插竹漁網
矚山高入蟻旋下
視舟立芥輕狂類
飛鯨宛轉亂石隘
崢嶸龍角尖硯碕
龜首癩嗟呀激頽
波出沒如水怪萬
古槌地雷三峽瀉
坪湃峰巒爭送迎
奔走萬馬快箭過
耳生風開口不暇
咳峭壁起衝流恍
若巨鼃戴上有舊
題名歲久字刻壞
豈無姓名存髣髴
年月載覽此前人
蹤徒為後人慨天
氣易寒暄光景倏
明晦浩蕩三日程
應接千萬態會登
天柱峰一覽宇宙
大少吐胸中豪神

遊八荒外題詩贈山靈清氣留勝槩

寄鉛山別駕完顏子忠

我議顏別駕風度脩且閒近持五色筆輝光動南蠻甘
飲石井水卧治鵞湖山玉峰露洒洒風林珮珊珊表表
臺閣姿豈久州郡間相思不相見可愛不可攀海風夜
月朗飛度七閩關

石上晚酌天章臺

晚涼上烏石置酒天章臺夕日下山去海風吹月來豪

氣吐千丈朗吟動三台
白露洒仙掌銀河瀉金杯
誰識芙蓉仙飛身在蓬萊

又

高臺在層霄肩輿上絕壁露下酒樽涼
月出海門白坐拂衣上雲醉卧林下石
西風吹鬢毛南斗在肘腋題詩
向天闌奎光射瑤席

宿臺山寺絕頂

江白潮已來山黑月未出
樹杪一燈明雲房人獨宿
近

金少隱集卷一
水星動搖河漢下垂屋四月夜深寒繁露在脩竹

望鼓山

鼓山起千仞迺是東海垠蛟龍穴其下霹靂翻海門砥柱儼不動日夜雪浪奔何當臨絕頂俯視浴日盆

題汀州丁三溪知事卷

三溪會汀州上有仙人居住乃是丁令威玉珮搖瓊琚高秋下風露水清映芙蓉華表慣聞鶴小船閒釣魚鑑湖風半曲賀老竟何如

夜興

千峰走晴雷風力吹邊雨層雲不成陰殘缺如敗堵山
深日易暝孤館孰賓主燈花翳復明落葉聲可數獨立
誰與親廚人夜深語

題茶陽驛飛亭

白雲飛出山怒壁蒼峽裂幽谷濕晴雲絕壁洒飛雪萬
折入滄海龍宮水晶闕簸揚弄珠人水簾掛寒月

將至大橫驛舍舟乘輿暮行

山行日已暮肩輿度林薄涼飈淒以清松子當面落千
山月崔嵬萬葉雨蕭索昨夕棹歌行頗憶溪上樂

又

月輪轉頭上溪瀨奏脚底人行山色中葉落雨聲裏虛
名為一官遊子在萬里行行重行行日夕聊復止

聞秋蛩有感

秋蛩集草樹淒然亦何繁行子在遠道豈不思故園禾
稻上邱壠鳥雀知欣喧田園可終老軒冕何足言

贈白雲

白雲抑何閒竟日不下山時從脩竹裏相伴一僧還悠
悠覆松頂渺渺歸岫間奔走塵俗客視君多厚顏

白雲答

使君抑何忙寧不思故山茫茫天壤間鳥倦猶知還石
田紫芝老茶竈碧蘚斑胡不賦歸來分子屋半間

望武夷

溪行望武夷峭壁何斬絕赤霞亂不收大化元氣泄下

有萬年松上有太古雪祗恐月明中鐵笛吹石裂

宿武夷

艤舟山水間借問武夷觀月掛水晶簾風吹紫霞幔雞犬過雲間笙樂度天半傳語武夷君酒熟幸相喚

吳橋縣古河堤

迢迢古河堤隱隱若城勢古來黃河流而今作耕地都邑變通津滄海化為塵堤長燕麥秀不見築堤人

溪行兩岸皆芙蓉桂花余喜遂賦此詩

芙蓉發蓓蕾桂樹花爛斑中秋前日過客子未出關香
生桂樹叢露下芙蓉葉花以寄遠人葉以作書帖何日
棹船還桂樹芙蓉間船頭聽我夜吹笛吹起月輪昇東
山

會杜清碧

夜宿武夷山迺是杜清叟清談道人同險路山鬼走出
門視河漢危梯掛星斗白露滿芙蓉清寒夜深久

又

我識杜清碧深居武夷山採藥紫芝嶺行歌白雲間天
根深可躡月窟高可攀天子召不起道人閒往還

晝卧雲際亭

紅塵如海深度水卧雲際白雲如故人千峰走羣婢長
歎一欠伸風葉飛滿地一鳥沒遙天樹矮渾如薺

過延平津

神物在天地變化須有時踴躍一入水風雲波浪隨志
士昔未遇常人安得知一朝忽奮迅兒女驚且疑

又

萬山二水合匯之為深淵劍化亦已矣過者尤凜然神
物豈常處入地忽上天所以磊落士豈為愚者憐

又

當時二龍劍迺是山川精埋沒於獄礎異氣騰豐城神
光射霄漢牛斗為不明一入壯士手長鳴除不平

鸚鵡曲題楊妃繡枕

水晶簾垂宮畫長六曲屏風圍繡牀美人春睡苦不足

夢隨飛燕遊昭陽覺來粉汗濕香臉一線新紅枕痕淺
三十六宮在眼前五色香雲隨指轉牙牀端坐楊太真
雲冠霞珮絳色裙雙成小玉盡宮樣繡衣烏帽高將軍
雕籠七寶掛宮樹玉案銀盤看鸚鵡可憐鸚鵡解人語
不說漁陽動鼙鼓迺知禽語能戲人不知人語能殺身
亡家敗國污天地天生尤物天亦嗔一朝艷質化塵土
可恨可憐千萬古香魂不逐馬塵飛猶記深閨繡房女
重簾紫霧垂洞房錦屏繡褥蘭麝香夜深酒醒換銀燭

時見楊妃在耳傍君不聞張麗華墮宮井銅雀章臺煙
燼冷繁華一夢人不知萬事邯鄲呂公枕

華清曲題楊妃病齒

沉香亭北春晝長海棠睡起扶殘粧清歌妙舞一時靜
燕語鶯啼空斷腸朱唇半啓榴房破胭清紅注珍珠顆
一點清酸入瓠犀雪色鮫綃濕香唾九華帳裏熏蘭烟
玉肱曲枕珊瑚偏玉釵半脫翠蛾斂龍鬋天子空垂涎
妾身雖侍君王側別有閒情向誰說斷腸塞上錦裯兒

萬恨千愁言不得城都遙進新荔枝金盤紫露甘如飴
紅塵一騎不成笑病中風味心自知君不聞華清宮一
齒作楚藏禍根又不聞馬嵬坡一身濺血未足多漁陽
一日鼙鼓動始覺開元天下痛雲臺不見漢功臣三十
六牙何足用明眸皓齒今已矣風流何處三郎李

楊花曲

燕京女兒十六七顏如花紅眼如漆蘭香滿路馬如飛
窄袖籠鞭嬌滴滴春風澹蕩搖春心銀箏華燭高堂深

繡裳不暖錦鴛夢紫烟紅霧天沉沉芳年誰惜去如水
春困著人倦梳洗夜來小雨潤天街滿院楊花飛不起

海棠曲

內家楚楚諸王孫白馬金鞍耀日暄樽前細樂耳厭聞
世上閒愁生不識宮錦裁成五色雲真珠感就雙龍紋
衣裳光彩照暮春紅靴著地輕無塵翠樓珠箔玉鈎掛
腸斷纖腰無一把海棠花底晝聞鶯太液池邊春洗馬
千枝萬枝桃杏紅花枝飄香薰酒中歸來月落酒未醒

有詔早入明光宮

藥珠宮

芙蓉城裏白玉樓水簾倒掛珊瑚鉤美人宴坐太清室
蛾眉不鎖人間愁彩橋東畔楊花轉飛到三天紫清殿
仙裳日暖藕絲香燕語鶯啼動幽怨天風冷冷吹珮環
霞冠不整偏雲鬟蕭郎風骨何可得紫簫赤鳳遊雲間
瑤壇午夜霜華重羅襪生寒紅一寸錦屏甲帳藥珠新
雲房火鼎丹砂嫩天宮仙女淡淡粧桃花洞口逢劉郎

巫山神女弄雲雨楚臺人去空斷腸步虛聲斷闌干外
春去秋來顏色改東風吹老碧桃枝深院無人夜如海

蘭皋曲

溪水潤蘭長幽芳春溪露滴蘭葉光美人日暮采蘭去
風吹露濕芙蓉裳芙蓉為裳蘭結珮玉立亭亭臨水際
天寒袖薄人不識疎雨蘭苔鳴翡翠幽蘭日日吹古香
美人不來溪水長

芙蓉曲兼善狀元御史

秋江渺渺芙蓉香秋江女兒將斷腸絳袍春淺護雲暖
翠袖日暮迎風涼鯨魚風起江波白霜落洞庭飛木葉
蕩舟何處採蓮花愛惜芙蓉好顏色

威武曲

桓桓燕將軍威武天下一赤面注丹砂虬髯如插戟當
年意氣何鷹揚手扶天子登龍牀五年垂拱如堯湯白
日騎龍昇上蒼桓桓燕將軍威武何可量熹微日出
東方早令一出照八方母使三月人皇皇母使三月人皇皇

如夢曲哀燕將軍

芙蓉花為誰好洞房昨夜將軍老將軍老去空鐵衣漆
燈照室人不歸

又

宮錦袍羶帳高將軍夜酌涼蒲萄蒲萄力重醉不醒美
人猶在珊瑚枕

又

海子頭誰家樓繡簾半捲風悠悠行人謂是將軍府將

軍不來罷歌舞

又

將軍容丹砂紅威風凜凜蓋世雄出門千騎塞行路今日蕭蕭去何處

又

平村曲春水綠將軍獵回曾此宿將軍一去成荒邱依舊平村春水流

又

皂鵬鷹紫駟馬將軍圍獵平沙野朔風蕭蕭吹野寒將
軍戰馬遊不還

又

將軍功世莫比皇都甲第連雲起將軍一去空鎖門上
馬臺邊無一人

又

皓齒歌細腰舞綠牕朱戶將軍府將軍老去無少年為
野草兮為荒田

又

如花人櫻桃唇傍人近前丞相嗔繁華日日笙歌動世
事悠悠總如夢

又

朝作樂暮作樂朝暮杯盤金錯落日出欲盡東方明歡
樂未已悲哀生

卧病書懷

去年走馬尋魏闕十里五里迷風烟孤臣泣血紫塞外

壯士倚劒青雲邊今年卧病在江海呼兒夜讀歸來篇
結茅倚壁知何處飽聽一枕松風眠

鞦韆謠

寒梅零落春雪灑蕭娘腰瘦無一把淡黃楊柳未成陰
何人已繫青驄馬畫樓深處迎春歸鞦韆影裏紅杏肥
濛濛花氣濕人面東風吹冷輕羅衣上粉珠流不歇
暗解翠裙花下摺殷勤莫遣燕子知會向人間報風月

過嘉興

三山雲海幾千里十幅蒲帆掛秋水吳中過客莫思家
江南畫船如屋裏蘆芽短短穿碧紗船頭鯉魚吹浪花
吳姬蕩槳入城去細雨小寒生綠紗我歌水調無人續
江上月涼吹紫竹春風一曲鷓鴣詞花落鶯啼滿城綠

皂林舟中

春溪野鴨肥可射幽樹深陰叫山鷓遠人三月酒船過
柳絮飛時杏花謝行行水竹上雲林往往人家或僧舍
小官便欲賦歸來何處買山錢可借

江南樂

江南樂春水虹橋滿城郭出門不用金馬絡門前花船
如畫閣綠紗牕虛鎖春霧隔牕蛾睂秋水活翡翠冠高
羅袖闊楚舞吳歌勸郎酌紫竹瑤絲相間作船頭柳花
如雪落船尾彩旗風綽綽秉燭夜遊隨意足人生無如

江南樂

江南怨

江南怨生男遠遊生女賤十三畫得蛾睂成十五新粧

金八八八
卷一
郎識面識郎一面思猶淺千金買官遊不轉郎家水田
跨州縣大船小船過淮甸買官未得不肯歸不惜韶華
去如箭楊花簾幕飛乳燕疎樹梧桐閉深院人生無如
江南怨

登歌風臺

歌風臺下河水黃歌風臺上春草碧長河之水日夜流
碧草年年自春色當時漢祖為帝王龍泉三尺飛秋霜
五年馬上得天下富貴樂在歸故鄉里中故老爭拜跪

布襪麻鞋見天子龍顏自喜還自傷一半隨龍半為鬼
翻思向日亭長時一身傳檄日夜馳只今宇宙極四海
一榻之外難撐持却思猛士衛神宇安得長年在鄉土
可憐創業垂統君却使乾機付諸呂淮陰年少韓將軍
金戈鐵馬立戰勲藏弓烹狗太急迫解衣推食何殷勤
致令英傑遭婦手血濺紅裙急追首蕭何下獄子房歸
左右功臣皆掣肘還鄉却賦大風歌向來老將今無多
咸陽宮闕親眼見今見荊棘埋銅駝臺前老人淚如雨

為言不獨漢高祖古來此事無不然稍稍昇平忘險阻
歌風臺前人已矣今人哀悲歌感慨下臺去斷碑春雨
生莓苔

過居庸關

至順癸酉歲

居庸關山蒼蒼關南暑多關北涼天門曉開虎豹卧石
鼓晝擊雲雷張關門鑄鐵半空倚古來幾度壯士死草
根白骨棄不收冷雨陰風泣山鬼道傍老翁八十餘短
衣白髮扶犁鋤路人立馬問前事猶能歷歷言邱墟夜

來鋤豆得戈鐵雨蝕風吹失顏色鐵腥惟帶土花青猶
是將軍戰時血前年人復鐵作門貌貅萬竈如雲屯生
存有功掛玉印死者誰復招孤魂居庸關何崢嶸上天
胡不呼六丁驅之海外休甲兵男耕女織天下平千古
萬古無戰爭

題魯港驛和貫酸齋題壁

吳姬水調新腔改馬上郎君好風采王孫一去春草深
漫有狂名滿江海歌詩呼酒江上亭墨花飛雨江不晴

江風吹破蟻眉月我亦東西南北客

寒夜聞角

野人卧病不得眠烏烏畫角聲淒然黃雲隔斷塞北月
白雁叫破江南烟山城地冷迫歲暮野梅雪落溪風顛
長門美人怨春老新豐還惜少年好夜深悲壯聲搖天
萬瓦月白霜華鮮野人一夜夢入塞走馬手提鐵節鞭
髑髏飲酒雪一丈壯士起舞擗帳前五更夢醒氣如虎
將軍何人知在邊

宣政同知燕京閭報國哀時文皇晏駕

雨傾盆風擲瓦白髯使者能騎馬相逢官長馬不下馬
上云云淚盈把

又

天柱傾天不晴白髯使者東南行東南山水失顏色一
夕秋風來上京

鼎湖哀

荆門一日雷電飛平地豎起天王旗翠華遙遙照江漢

金史卷一百一十五
卷一
八表響應風雲隨千乘萬騎到關下京師復覩龍鳳姿
三軍卯破古北口一箭血洗潼關屍五年晏然草不動
百穀穰極風雨時修文偃武法古道天閣萬丈奎光垂
年年北狩循典禮所在雨露天恩施宮官留守掃禁闕
日望照夜迴金羈西風忽湧鼎湖浪天下草木生號悲
吾皇騎龍上天去地下赤子將焉依吾皇想亦有遺詔
國有社稷燕太師太師既有生死託始終肝膽天地知
漢家一線繫九鼎安肯半路生孤疑孤兒寡婦前日事

況復先生親見之

歲云暮矣

歲云暮矣子將焉之江南木落鴻雁飛娟娟美人淮水
涯淮水去不止相思日千里

又

歲將暮矣子將焉往燕山雪花大如掌娟娟美人淮水
上淮水日夜流相思人白頭

又

金州月令卷一
歲云暮矣子將焉行江南木落天雨霜娟娟美人淮水
傍淮水不回頭行人上小舟

京口寒夜和葛秀才牀字韻

秋高馬肥弓力强山空木落天雨霜邊庭晏然草不動
漢家將軍一丈長江南地濕小臣病閉戶一月不下牀
願言昭代舉天網亦有枳棘棲鸞鳳

江上聞笛

江上何人吹玉笛水冷沙寒龍夜泣鮫人水底織冰綃

灑淚行珠明月高銀河淡淡月茫茫雁奴打更沙渚傍
更深繡被夜寒重明月梅花滿地霜

夜寒獨酌

欲雪不雪風力强欲睡不睡寒夜長玉奴剪落燕尾燭
銀瓶煮酒浮鵝黃三軍豪氣不可敵醉倒綠鬢參軍郎
夜深大吟且就枕明朝萬瓦看晴霜

又

去年健兒筋力强豪氣不減關雲長揮戈叱咤陣雲黑

邊風白晝吹日黃將軍威武不可近錦袍赤面黃鬚郎
今年收功入將府烏靴曉踏天街霜

又

江風吹浪十丈強孤舟遠客愁夜長何如歲晚在家者
擁爐酌酒天昏黃蔡州鵝鴨持元濟滹沱馬渡悲王郎
盃中有物且須盡勲業滿鏡生秋霜

相逢行贈別舊友治將軍

并序

予遷官出閩舟行抵興田驛二十里許俄聞擊鳴金

鼓應響山谷間隨見旌旗導前兵卒衛後中有乘馬者毳袍帕首徐行按轡屢目吾舟吾病久氣餒不能無懼心也頃之興田驛吏以行輿見迂遂舍舟乘輿嚮之旌旗兵卒移導輿前馬從輿後輿行馬鳴途中未敢交一語迫暮至邸舍燭光之下毳袍者進曰某乃建之五夫巡檢官聞使君至候此將一月矣某嘗三識使君面自都門一別今已五載使君豈遺忘之耶僕驚訝曰將軍何人也答曰某即使君舊友雲中

也熟視久之恍如夢寐雲中復能紀余闕下丰采時
否耶歷歷關河舊遊如隔世乃對燭光夜道故舊明
日復同遊武夷九曲煮茶酌酒臨流賦詩出入丹崖
碧嶂間心與境會天趣妙發長歌劇飲相與為樂酒
闌興盡秋風淒淒落木雨下閨闌在望復作遠行予
始見君而懼次得君而喜終會君而樂又得名山水
以發揮久別抑鬱之懷樂甚而復別別而復悲悲復
繼之以思也嗟夫人生聚散信如浮雲地北天南會

有相見因賦詩復為相逢行以送之

一年相逢在京口笑解吳鉤換新酒城南桃花正開
白面青衫鞭馬走一年相逢白下門短衣窄袖呼郎君
朝馳燕趙暮吳楚逸氣不覺凌青雲一年相逢在關下
東家蹇驢日相假有如臣甫去朝天泥滑沙堤不敢打
都門一別今五年今年相逢滄海邊千山木葉下如雨
雁聲墮地秋連天將軍毳袍腰羽箭擁馬旌旗照溪面
小官不識將軍誰卧病孤舟強相見豈知此地逢故人

摩挲病眼開層雲舊遊歷歷如隔世夜雨豈知思同羣
郎君別後瘦如許無迺從前作詩苦溪頭月落山館深
剪燭猶疑夢中語人生聚散亦有時且與將軍遊武夷
弓刀掛在洞前樹洞裏仙童來覓詩稽首武夷君借我
幔峰頂分我紫霞盃與子連夜飲左手招子喬右手招
飛璫舉觴星月下聽吹雙鳳笙我酌一盃酒持勸天上
月勸爾長照人相逢莫向關山照離別鳳笙換曲曲未
終天風木杪飄晨鐘拂衣罷宴下峰去又隔雲山千萬

重

七夕後一夜樂陵臺上倚梧桐樹望月有懷御史

李公藝

涼風吹動梧桐葉瀉下泠泠露華白樂陵臺上悄無人
獨倚梧桐看秋月月高當午桐影直不覺衣沾露華濕
此時却憶金陵人酒醒江樓聽吹笛

北風歌送王君實并寄憲副順子昌

北風日日吹浮雲西南一星光射門出門見客箝口坐

打馬送君收淚吞箝口祇自知吞淚竟何益木葉下玄
霜日日北風急北風吹淺淮南波坐見白日浮雲多九
關虎豹卧不動奈爾狐狸燕雀何

留別同年索士巖經歷

欲落不落天上雪欲去不去閩中人紅塵香暖荔枝國
白日醉卧芙蓉茵功名富貴儻來物政事文章奚足珍
人生所貴在知己四海相逢骨肉親在知己寧論千里
與萬里志士雞鳴中夜起秋雨粼粼劒光紫

走筆贈燕孟初

別君金陵城遇君錢塘驛
落魄江湖嬾折腰笑傲公侯
但長揖柳花吹香撲酒缸
酒波灩灩如春江西湖天鏡
碧墮地吳山蛾眉春入牕
平生豪氣如虹吐餘子紛紛
何足數驛亭把酒歌別離
醉聽江潮鳴萬鼓

偕卞敬之遊吳山駝峰紫陽洞

天風吹我登駝峰
大山小山石玲瓏
赤霞日射紫瑪瑙
白露夜滴青芙蓉
飄飄雲氣穿石室
石上涼風吹紫竹

金川月令卷一
掛冠何日賦歸來掃石篝燈洞中宿

過桐君山

桐山峨峨桐水清仙人不住芙蓉城山頭笑指梧桐青
至今山水俱得名丹光夜照江水赤赤浪神魚夜飛出
碧桃花下覓神仙白日山中遇樵牧江深谷響山有靈
東山人喚西山應漁人誤入水簾洞石崖倒掛丹崖藤
祠荒路斷行人少石上清風長瑤草月明黃鶴飛渡江
仙人一去梧桐老

夜泊釣臺

雙崖屹立幾千仞下有一葉之孤舟
繁星亂垂光煜煜長藤古木風颼颼
荒祠幽黑山鬼集怪石如人水邊立
錦峰繡嶺雲氣深萬壑千巖露華滴
山僧對語夜未央不知風露滿衣裳
喚船振錫渡江去林黑無由歸上方
高寒宇宙無人語亂石灘聲灑飛雨
欲從嚴子借羊裘坐待船頭山月吐

武夷館方池

武夷之境多神仙我亦駐此臨風軒方池清夜墮碧月
重簾白日垂洞門暗泉湧池紫波動微雨在藻金魚翻
倚闌照影清光底拄杖卓石尋無原洗頭玉女去不返
遺此丈八芙蓉盆溪船明日泛九曲出入紫翠聽潺湲
便從此地覓真隱何必商山求綺園

蛾眉雲謝照磨李伯貞遺白石

至元丙子歲六月照磨覃懷李君諒伯貞以白石小
山見遺細潔光瑩奇秀礫砢置之石林亭上名之曰

蛾眉雲

仙人李太白俊逸天下聞芙蓉宮錦袍袖有蛾眉雲蛾
睂山高劍門隔化為太古一片雪南州北越行相從赤
日炎風消不得今年東海逢故人海波灩灩葡萄春酒
酣拂袖墮秋水但覺滿座光嶙峋夜深酒醒伴狂客玉
井蓮開華峰白海天落月掛奎婁坐卧猶疑見顏色禿
兔漫吐蛾睂雲何以報答雙南金古人契義重金石此
物歲寒冰雪心

題壽監司所藏美人織錦圖

卷中織錦秦川女大姬啞啞弄機杼小姬織倦何所思
簾幕無人燕雙語成都花發江水春門前馬嘶車磷磷
髻雲兩耳看欲墮蛾睂八字畫不伸行人一去無消息
冰蠶吐絲成五色柔腸九曲細於絲萬縷春愁正如織
綺牕睡起聞早鶯西樓月落金盆傾暖霞拂地海棠曉
香雪潑戶梨花晴日長春院機聲動梭影穿花飛小鳳
水心驚起鴛鴦棲花底不成蝴蝶夢纖纖玉指柔且和

香鈎小襪裁春羅滿懷心事付流水蕩目雲錦迴青波
佳人自古多命薄風裏楊花隨處落豈知醜婦嫁田家
生則同衾死同槨君不聞長安城中花滿枝東家蝴蝶
西家飛籠中鸚鵡喚新主門裏侍兒更故衣又不聞田
家婦日掃春蠶宵織布催租縣吏夜打門荆釵布裙夫
短袴我題此卷三歎吁百年醜好俱虛無排雲便欲叫
閭闔為我獻上豳風圖

題畫馬圖

漢水揚波洗龍骨
房星墮地天馬出
四蹄蹀躞若流星
兩耳尖修如削竹
天閑十二連青雲
生長出入黃金門
鼓鬃振尾恣偃仰
食粟何以酬主恩
豈堪碌碌同凡馬
長鳴噴沫奚官怕
入為君王駕鼓車
出為將軍靜邊野
將軍與爾同死生
要令四海無戰爭
千古萬古歌太平

題雲山圖

我有將軍萬疊青
換得琅玕半牕綠
月明恐有鳳來棲
日暮何妨雲借宿
清時海宇無烽烟
五風十雨歌豐年

看山愛竹了公事焚香掛畫似神仙城頭漏箭催更鼓
將軍夜寢元戎府怪底雲山光滿林牀頭斜掛三珠虎

題陳所翁墨龍

畫龍天下稱所翁禿筆光射驪珠宮長廊白日走雲氣
大厦六月生寒風興來一飲酒一石手提玄兔杵霹靂
漲天烟霧晴不收頭角崢嶸出牆壁全形具體得者稀
今日海邊親見之滿堂光焰動鱗甲倒披海水空中飛
臨風直上九天去天下蒼生望霖雨太平天子居九重

黍稷穰穰千萬古

題壽監司所藏瘦馬圖

沙場日暮春草肥瘦馬不受黃金羈天生神駿天所愛
豈容過市無人知郎官病坐芙蓉幙喜見馬圖天上落
人生相遇貴相知孰謂世間無伯樂

題喜里客廳雪山壁圖

一年在京口雪片深冬大如手獨騎瘦馬入誰家四面
雲山如甕牖大江東去流無聲金焦二山如水晶瓜州

江口人不渡時有蓑笠漁舟橫一年在建業臘月楊花
滿城雪五更凍合石頭城霜風鼓寒冰柱裂秦淮酒樓
高十層鍾山對面如銀屏鷺洲不見二水白天外失却
三山青一年在鎮陽燕山積雪飛太行滹沱冰合斷人
跡井陘路失迷羊腸長空萬里絕飛鳥捲地朔風吹馬
倒狐裘公子獵城南茅店酒帘懸樹杪今年入閩關馬
蹄出沒千萬山瘴雲朝暮氣藹藹石泉日夜聲潺潺雪
花半落不到地但見晴空湧流翠海頭鼓角動邊城木

未樓臺出僧寺何人蹇驢踏軟沙出門無處不梅花江
潮入市海船集水暖遊魚不用叉良工寫出雪山壁過
眼令人憶南北玉京銀闕五雲端待漏何年鳳池側

和題吳閒閒京館王本中醉作竹石壁上

硯屏花落丹水香步虛白日聲琅琅江南道士愛瀟灑
新粉素壁如秋霜王郎酒後衫袖濕醉眼朦朧電光急
黑龍雲重雨脚斜白兔秋高月中泣倦遊借榻日觀東
恍惚舊夢三湘中鷓鴣聲斷江路遠青松雨暗春濛濛

梅仙山行

赤星落色漢祚微端門日日邊風吹咸陽秋色壓宮樹
金人夜泣銅駝悲先生袖疏探虎窟漢鼎猶堪支一足
九重烟霧似海深門外何人知慟哭賊莽白日升高臺
玉璽墮地聲如雷周公揖讓孺子戲絳袍將軍何日來
塵飛滄海風擲瓦白鶴身輕快如馬一聲鐵笛度閩關
山月溪風共瀟灑龍爭虎鬪耳不聞長嘯袖拂松枝雲
夜鐙白日煮秋雨玉佩赤錦飄霞裙先生一去幾千載

尚
有當年遺跡在題詩絕壁寄先生
頓使林巒顏色改
藥爐寂莫秋草深
丹井水落莓苔侵
至今火灰化為土
猶有丹光穿樹林

釣雪圖

天寒日暮烏鴉啼江空野闊黃雲低
村南村北人跡斷
山前山後玉樹迷
歌樓酒香金帳暖
豈知篷底魚羹飯
一絲天地柳花春
萬里烟波蓮葉遠
風流不數王子猷
清興不減山陰舟
人間富貴草頭露
桐江何處覓羊裘

還君此畫三歎息如此江湖歸未得洗魚煮飯捲孤篷
江上雲山好顏色

登雲際題壁

長吟入雲際袖拂日邊霞摩挲織女機拄杖倚靈槎聞
說名泉竒觀倒瀉銀河千丈玉乳濺飛花寄語陸鴻漸
我有武夷茶令僕支鐙僧掃葉鶴看家不妨茶罷酣歌
醉飲直到日西斜滿筆淋漓醉墨應有山靈夜護林壑
動龍蛇秉燭下山去渡口月籠沙

題四時宮人圖

紫宮風暖百花香
玉人端坐七寶牀
鳳凰小架懸夜月
一女侍鏡觀濃粧
背後一女冠烏帽
茶色宮袍靴色皂
手持團扇不動塵
一搦香彎立清曉
一女淺步腰半朧
小扇輕撲花間蛾
淡陰桐樹一女立
手抱胡牀眼轉波
牀頭細鎖懸金鐘
白鶴雙飛花影重
詞人見此神恍惚
巫山夢裏會相逢

又

金猊吐烟清晝長美人坐倚白玉牀藍衫一女髻垂耳
手持方扇立坐傍一女最小不會粧高睂短髮耀漆光
玉纖綠筍握金翦柳下輕挽宮人裳金盤玉甕左右列
紅桃碧藕冰雪涼冰壺之傍立一女背後隨以雙白羊
手拱金瓶瀉水忙酒翅灑雪驚鴛鴦鴛鴦得水自雙浴
美人抱膝空斷腸

又

盆池露冷荷半枯碧波風細雙遊魚美人坐此碧玉椅

屏山方案碧蟾蜍椅後二女執纓立案前二女嬌滴滴
大女手扶小女腰小女嬌倚大女膝涼風入樹落翠槐
秋深不見羊車來金鈴響處吠黃犬美人笑托芙蓉腮

又

錦屏三面圍繡牀沉香椅上鳳褥光美人端坐袖雙手
臨睂半感愁夜長椅後一女搖白羽一女執纓更回顧
一女烏帽金縷衣玉指纖纖攜小女小女手挽大女腰
笑看孔雀雙翠翹可憐美人獨自坐翠竹雪響風前梢

清明日偕曹克明登北固樓

江南三月萬花柳北固山頭一回首東風吹綠揚子江
灩灩江波瀉春酒況乃又是清明天元從一飲三百錢
英雄一去幾千載當年飲者今何在陌上家家列紙錢
孫劉高塚何人拜三月三日風又暖千家萬家桃李開
少年白日騎馬去滿城紅雨拂面來共君且須飲一斗
處世不必歌七哀孫劉事業果何在百年斷石生蒼苔

送廣信司獄

江城六月涼雨餘吳郎買舟之鵝湖江南酌別酒滿壺
酒盡落日青天孤如君俊氣江海少奇語驚人天所寶
春鶯乳燕綠牕深酒醒夢回銀燭小江東子弟多少年
見君丰采如神仙時明刑措日無事檀板且下鵝湖船
鵝湖山下秋稻熟鵝湖山前秋水綠五風十雨樂太平
肯使人間有冤獄

和友人遊鶴林韻

何人結屋山之阻賸水殘山半間與竹院東風僧未歸

落日樓臺自鈴語劉家事業今沉淪空餘黃鵠青嶼岫
孫家氣概果何在當時未必分偽真可憐處士若馮道
安得罵賊如張巡百年往事空白日萬山花落如紅塵
不如掃地傾二斗徑造何必問主人東廊西廊雲不掃
白鶴歸來立華表沈郎敲棋山鳥驚陳郎落筆龍蛇遶
葛公飲酒不論錢何必三茅求悟道烏髯白面郭將軍
痛哭長歌寫懷抱了公絕若耳不聞何處深山拾瑤草
倚歌和者病參軍小牕病起風日好茶蘼滿庭香雪晴

卷一
柳花簾幕捲春曉人生樂事當勝遊山堂作者半日留
古來此事誰不樂只恐人去山靈愁

高堂劉侯定齋野友亭

淮陰季年韓將軍狡兔已死走狗烹沛中白髮周將軍
碧色已滿細柳營何如高堂劉將軍太平不許矢石勲
棹頭青海無傳箭天山掛却烏角巾歸來買地築小亭
淥水為鏡山為屏樵人溪叟日相過野歌村舞醉復醒
去年偶爾劒戟鳴潼關馬過戰血腥白頭老子如不聞

牛背一笑千山青

賀山長邱臣敬復淮西田

鄆城公子人中英天恩教領來國城秋霜滿區老劒鳴
開口磊落肝膽明前年歲豐夏無麥去年雨足秋無粟
先生激烈氣不平館下誰令有饑色揚眉掉臂傍無人
義動天子耳目臣誰人歸我三千里坐令孔席回陽春
只今寒士望梁棟文梓高梧天所用諸生食飽待先生
日午杏壇看舞鳳

補闕歌

錢塘三日風雨急古銅夜光飛霹靂是知神物出人間
猶帶吳宮土花碧玉橋素練懸銀河支機女兒飛鳳梭
蝦鬚風軟亂纖影春水日晴生潮波破牕冷硯留不得
零落江南酒家客狂歌索酒仰面歌誤擊紅籌唾壺裂
何人進入蓬萊宮銀屏碧幙珠簾重此生補闕亦何用
玉龍瀉水流芙蓉

過淮河

淮水清河水黃出門偶爾同異鄉排空捲雲若飛電隨
風逐浪庸何傷東流入海殊不惡萬里同行有清濁

擁爐夜酌嘲張友寄詩謝

張生不好酒飲酒如飲藥得酒味濡唇形影先落魄野
人飲不辭飲盡盃中酒酒渴向茶煙松風語幽壑芳山
道士胡不來一夜燈花向人落

送友人之京

霜高木落河始冰臺郎別我之燕京朔風迎面飛鳥盡

臘雪打帽鞭馬行新年捧表拜闕下春寒詔賜玻璃觥
朝官如問小參軍為言卧病丹陽城

題南宮子蠟嘴圖

南宮山人何俊奇小牕睡起涼雲飛野棠秋早霜子熟
枯木葉高蠟嘴肥滿前累累甘爾口正猶癡心落人手
五陵年少知爾名一飽無人早回首

西樓別寄閩憲諸公

八月八日溪上別溪上彩旗紅獵獵離情已逐渡江雲

邊草連天翦秋色玉驄金虎諸大夫欲別不別留斯須
沙明淺渚白鳥下酒盡落日青山孤丈夫有淚不須灑
去客掛帆君上馬悠悠回首各東西惟見西溪捕魚者
閩關一片月太行一片雲雁書遠寄隔山嶽雲飛月明
多憶君

贈別鷲峰上人

并引

予遷官出關過建陽會同年契世文邀予至其家因
登溪閣俄聞茂林脩竹間有絃誦之聲詢世文乃靈

山上人也頃之相會閣上臞然如鶴悠然如踏雲出
所作詩一帙蕭然有林下風也予南出閩世文亦將
赴官編修鷺峰送予溪上徘徊顧望有不忍別意鷺
峰湖南人本姓歐陽靈山其釋名鷺峰其自號乃座主
翰林侍讀歐陽之族雖縉流而其家學有自云

建溪秋高山水清溪邊偶識衡陽僧臨水洗鉢掛溪閣
夜訪校書天祿燈聖經佛偈通宵讀首宿堆盤勝食肉
回雁峰南難寄書武夷洞前堪煮粥西風獵獵吹水寒

相送郎官南出關校書公子玉京去衡陽上人何日還
手中玉杖春雨綠母乃湘君廟前竹胡不截作雙鳳簫
吹作來儀舜庭曲古曲雅以淡天高難上聞不如且掛
杖頭月歸卧祝融峰畔雲

送馬伯庸子之京

欲晴不晴天氣慳欲別不別人語難丈夫意氣自磊落
握手一笑心與肝南宮子弟吐金縷何必樽前花解語
樹搖晚翠下風涼燭落春紅剪秋雨高歌痛飲如有神

醉吐不惜車中茵明朝送子上船去回首江南江北人

送韓司業

楊花落盡梅子青丹陽酒滿雙玉瓶使君買舟渡江去
落日淡淡波溟溟先生抱才登館閣東壁文采光龍廷
自憐落日江湖上為言縱跡如雲萍

蒲萄酒美鱗魚味肥賦蒲萄歌

揚州酒美天下無小槽夜走蒲萄珠金盤露滑碎白玉
銀甕水暖浮黃酥柳花吹盡春江漲雪花鱗魚出絲網

李郎載酒過江來，開酒斫魚醉春晚。
世事反覆如桴鼓，會須一飲空百壺。
淋漓宮袍亦奇士，夜起看對青燈孤。

江南春次前韻

江南四月春已無，黃酒白醅紅櫻珠。
吳姬小醉弄絃索，十指春雪如凝酥。
池塘過雨春波漲，風捲楊花落蛛網。
翠簪新婦歌春愁，白馬少年歸日晚。
遊魚水淺出短蒲，誰家銀箭飛金壺。
日長睡起翠陰午，簾外忽過流鶯孤。

送鶴林長老胡桃一裹茶三角

胡桃殼堅乳肉肥香茶雀舌細葉奇枯腸無物不可用
寄與說法談禪師竹龍吐雪澗水活茅屋烟吹樹雲薄
竹院深沈有客過碎桃點茶亦不惡

寄省郎沙子丁

憶昔射策官明光序列前後如雁行不才瘦馬走州縣
君已落筆中書堂巍巍中書開大府宰相出入勢如虎
省郎夜直殿燭長紫薇花間月當午有人此際猶未還
正與士卒夜守關風吹衣裳露被面舉目只是水與山

嗟余同時異甘苦何時逢君傾一語典衣為買小紅舟
剪燭西牕聽秋雨

夏夜積雨霽陰雲不收病坐南軒月復出

積雨已斂雲不明淡月忽出戶牖晴幽人開牕看月色
投入懷抱亦有情數宵相連爾何在應駕老蟾出東海
今宵見爾不得眠未脫人間女兒態愛渠中夜雪滿庭
照出飲顥山脰形何人此際步微影玉堂珂珮風泠泠

連夜雨晴

石榴花紅細雨白江南四月天氣涼須臾雲散忽晴色
滿院花樹生幽香幽人抱病無可語日出南牕看晴雨
小兒造化多戲人世上俗子徒勞神

題郭元二公畫壁

兩山出沒如虎頭爭奇角怪不肯休一山如龍入雲去
一山化作長江流峻嶒相雄不相下欲向人間索高價
塵中有客語如狂龍者可先江者亞一笑上馬歸醉眠
麴生使我多妄言酒醒忽記夜來語先者姓郭亞者元

次韻休上人見寄

山深樹密鳴鴉肥
山人得句多清奇
深沈竹院白日靜
焚香自禮天人師
門前雨過巖花活
涼風蕭蕭袖衣薄
狂隣卧病在江城
懷抱思君空作惡

復次前韻東龍江上人

山中酒熟黃雞肥
閉門索句何瑰奇
何人剝啄急如雨
門前忽見黃冠師
揮毫落紙龍蛇活
愧我無能才思薄
欲師更洒楊柳枝
瘡鬼牀頭敢為惡

夜坐贈秀才

青原故人貧且窮
燕山野客疲且聾
擁爐不覺殘火白
開牕忽見月明東
乃知清景不可得
得詩一笑衰顏紅
夜深吹燭且睡去
樓外落雁呼霜風

夜坐分韻得此字

逢冬亦欲鄉風舉
客舍蕭條念閭里
夜寒鐵馬嘶北風
漏下銅壺凍春水
牀頭斗酒復何為
燈下三豪猶在此
明朝上馬氣如雲
揮劒長歌為君起

曉起

烏鴉啞啞霜樹晴紙牕潑眼春雪明野人卧病睡方起
官街踏踏聞馬行矮牕小戶坐終日煮茶繞坐松風生
明朝呼兒刷駿馬出門一笑青天橫

賡眠字韻

去年走馬尋陽關五里十里逢烽煙孤臣泣血紫塞外
壯士倚劒青雲邊今年卧病在江海呼兒夜讀歸來篇
結茅松壁知何日飽聽一枕松風眠

賡覆字韻

朔風吹帳滅前燭將軍夜擁貂裘宿玉關飛雪入紫宮
白髮孤臣守金屋近思往事良可悲世事擣菹多反覆
古來宮殿說咸陽落日猿啼掛枯木

送友人之金陵

陳郎買舟之金陵寒江水落風浪小飛帆遠掛蔣山青
空城畫角秦淮曉白門酒美香滿城吳姬喚客客不行
樓中子弟盡年少玉奴行酒吹鸞笙陳郎不聽黃金縷

朝走東吳暮走楚半生落魄一布袍感慨長歌弔千古
六朝遺跡生暮烟故家荒塚迷花鈿鳳凰臺上醉李白
何人知子囊無錢

元子遊戲竹木

元君磊落誰與同秃筆一掃俗子空蕭條瘦竹卧疎雨
槎枒老樹懸春風野人卧病在京口見君此畫心神融
何人識此歲寒景為我進入蓬萊宮

送惟英之淮安

江南木落天欲霜故人別我之淮鄉野人一月病在牀
不能送子河之傍殷勤拂子衣上黃呼子醉酒三百觴
歲寒歸計不可忘吳門白髮遙相望

同友人揚子江送客

將軍之馬駿且雄葛仙騎之如遊龍金陵之酒香且冽
葛仙飲之豪興發馬上送客揚子津下馬飲客金陵春
主人上馬客已渡回首江南江北人

題江鄉秋晚圖

沙頭潮下秋水枯雲山落日雲模糊草堂遠近路長驅
蕭蕭行李行人孤蹇驢渡橋歸思急村南村北天秋色
何者相呼雞犬聲山前山後烟樹立江風水面吹殘莎
打魚小艇如飛梭何人盪槳立船尾釣者船頭腰半駝
小李將軍不可作粉壁流傳愁剝落石門守者猶可竒
柱杖敲門索新跋京口綠髮參軍郎見君此畫心即降
攜家便欲上船去買魚煮酒揚子江

為九江方七高賦

匡廬山中有佳士讀書結屋青雲松碧牕夜影紫翠動
落日照見香爐峰窺燈夜壁山鬼過采蘭東徑仙人逢
危簷墮雪聽風竹古寺隔嶺聞煙鐘每思幽絕動歸興
歲晚落葉迷行蹤扁舟何日過湖口分我半壁青芙蓉
將至太平驛即興

上灘泊處無十里舟人鼓舞家家喜到驛歡呼如到家
明日舟行復如此驛行傳食過年年何日歸種淮南田
玉堂金馬雖云貴白酒黃雞不論錢

中秋月夜泛舟於金陵石頭城

秦淮流水西復東倒涵天影磨青銅飛廉掃空出海月
明珠飛入琉璃宮著我扁舟二三友江上雪槎泛牛斗
笑語人間兩岸燈進君江上一尊酒醉來起舞聽浩歌
宛如玉樹春風和世間樂事古來少天下月明今夕多
六代江山自瀟灑潮落潮生石城下人生得意當歡遊
此月此水年年秋

曉上石壁灘

龍溪三月人上船十里五里灘聲喧浪花飛雪灑石壁
船尾落月傾金盤越兒卧篙頭刺水露重布帆風不起
近山鐘動石樓中隔水雞鳴烟樹裏過江日日水與山
詩人得趣如得官白雲遙在太行北何日歸舟下石灘

過臨平

昔人五月臨平路汀洲藕花滿無數此來三月過臨平
雪白楊花捲波去楊花捲盡藕花開今人古人俱到來
欲向山陰尋賀老酒船到處且徘徊

越溪曲

越溪春水清見底石罅銀魚搖短尾船頭紫翠動清波
俯看雲山溪水裏誰家越女木蘭橈髻雲墮耳溪風高
采蓮日暮露華重手滴溪水成蒲萄盈盈隔水共誰語
家在越溪溪上住蛾眉新月破黃昏雙櫓如飛剪波去
紫溪道中

三月晦日春欲還深林百鳥鳴間關綠雲迷合紫溪嶺
白雨遙掛烏石山山高雨落不到地萬壑千巖灑飛翠

遠人送春千里歸風送籃輿野花墜間關咫尺上青霄
海上三山路不遙地僻題詩公事少芙蓉帳裏紫雲飄

和同年觀志能還自武昌詠

短衣匹馬走江漢山川歷歷何雄哉漢陽風緊鼓角動
洞庭水深鴻雁來雪消巴蜀浪翻屋黃鶴磯下聲如雷
是時立馬夜呼渡清江苦竹猿聲哀

溪行中秋翫月

并序

余乃薩氏子家無田囊無儲始以進士入官為京口

錄事長南行臺辟為掾繼而御史臺奏為燕南架閣
官歲餘遷閩海廉訪知事又歲餘詔進河北廉訪經
歷皆奉其母而行以祿養也後至元三年八月望舟
泊延平津是夕星河燦然天無翳雲月如白日溪聲
潺湲若奏樂四山環抱如拱如立如侍左右奔走執
事者薩氏子奉母坐船上與其婦具酒餚盤饌奉觴
上壽繼而若妹若壻若婢若僕以次而進和而不褻
謹而怡怡月色蕩酒而溪韻雜笑談母懽甚至舟人

醉飲亦相與鼓枻作南歌而樂今夕何夕不知奉親之在異鄉也嗟夫昔人所謂宦遊之樂不如奉親之樂實天樂也薩氏子於是命婦盥爵滿以酒再拜為母壽而作歌曰

龍津秋水涵太虛今夕何夕光景殊皓月當鏡星貫珠河漢倒影垂平蕪微波漾漾風徐徐新涼拂拂飄裙裾阿母今年八十餘清晨理髮雲滿梳起居儼重天人如有子在官名在儒奉母祿養南北區晨昏不忍離斯須

荆楚燕趙閩粵吳今年去官南海隅北上咫尺天子都
官船輶輶如安車阿母坐卧襟懷舒清晨夜泊不知挈
母在船上重褥鋪芙蓉映水搖艷艸開甕酒熟浮新蛆
秋園摘菓雨剪蔬船尾曲突通行廚家雞水鴨美且腴
鯉鯽鮮大如江鱸奉觴酌酒前拜趨月波蕩酒如浮酥
子為母壽婦壽姑阿妹次進偕壻夫酌獻亦及婢與奴
熙熙春盎無親疎行禮有節俱歡娛阿母笑語情愉愉
有婦右策兒左扶舟人醉飽從歡呼鼓枻節歌聲鳴嗚

四山疊翠開畫圖溪瀨漱石如笙竽雙壺酒盡村可酤
盤饌狼藉溪可漁人生此樂更有無異鄉到處同里閭
惟期母壽莊椿踰有子願效返哺烏作詩記實無浮譽
至元丁丑仲秋書

黯淡灘歌

長灘亂石如疊齒前後行船如附蟻逆湍衝激若登天
性命斯須薄如紙篙者倒掛牽者勞攀崖仆石如猿猴
十步欲進九步落後灘未上前灘遭上灘之難難於上

絕壁雖有孟賁難致力灘名况復呼黯淡過客攢眉增歎息
下灘之舟如箭飛左旋右折若破圍歡呼踏浪棹歌去晴雪
灑面風吹衣飛流宛轉亂石隘奔走千峰如馬快賈客思家
一夕還傳語灘神明日賽下灘之易易如盤走珠瞬目何可
停須臾長風破浪快人意朝可走越暮可吳乃知順逆有如
此逆者悲愁順者喜請君聽我黯淡歌順則流行逆須止順
者不必喜逆者不必愁人間逆順俱偶爾且得山水從遨遊

雲際感興

昨日登芝峯茲晨陟雲嶺俯視城中居萬瓦落深井風
露灑灑生秋寒飛泉落澗聲潺湲筍輿輶輶度脩竹石
闌曲曲躋層巒層巒絕頂天尺五我欲排雲擊天鼓九
關虎豹不須驚吐膽開心見天語天鼓不可擊天門何
日開請君聽我紫芝曲手招白雲歸去來

百禽歌

漢密將軍開大府門外紛紛客如雨繁絃急管耳厭聞
要聽山中百禽語購求走馬東海頭海頭百禽聲啾啾

疾飛苦走亦不免能言有色貽身憂將軍縱使花作屋
不似山林有真樂江南白苧細於絲紫竹方籠作青幙
鸞鳳在野麟在郊太平將軍胡不招簫韶一奏百獸舞
玉帛萬國皆來朝嗟嗟百鳥何足錄日食將軍太倉粟
色衰身死螻蟻分不補將軍一臠肉箇中鸚鵡最能言
不說輿夫行路難萬山雨暗泥滑滑不如歸去聲亦乾
行不得也哥哥九關虎豹高嵯峨行不得也哥哥

雨傘

開如輪合如束剪紙調膏護秋竹日中荷葉影亭亭雨
裏芭蕉聲簌簌晴天却陰雨却晴二天之說誠分明但
操大柄常在手覆盡東西南北行

梳頭樂府

紅綃捲袖搖劍聲摩挲睡眼窺秋菱陽臺夢斷不知處
一片烏雲愁欲傾一鉤新月掀雲起月漸低流蘇草地
玉纖盤轉戲龍形寶釵壓定飛鴉翅撩春撥曉誇自然
黃金雙燕珍珠蟬白頭老嫗低低笑不覺婆婆二八年

燈草

天涯何處無青青王孫去後蘼蕪深瑤田手種綠玉髮
道是無情却有心此心未明人未識金篦剖腹森如戟
撮將一縷玉蟲兒散作萬家紅粟粒侯門珠網百面霞
秦樓玉樹雙頭花慧燈莫與羣迷染正性何愁慾鏡遮
韓堂風露光微顫萬古聖賢對面面但勤挑剔不憚勞
萬炬金蓮紅藥院

胡桃

武陵仙子裙如血不肯洞中事幽絕東風吹珮嫁西羌
生子稜稜剛似鐵道逢賈客懷故山遣兒隨客東南還
銅鈴破曉廣沙漠蠟彈絨愁度玉關瑤池阿母沈吟久
何物外孫如此醜撇歸鸚鵡不回頭欲啄無由堪下口
誰知造化無秋春人間枯槁中清淳請君剖破渾淪看
會見空腔都是仁

芒鞋

東家西家買芒屨南州北州多歧路嚴霜烈日太行坡

斜風猛雨瓜州渡南人求利赴北都北人徇利多南趨
朝朝迎送名利客身身消薄非良圖人負屢屢負人草
從土生復歸土人兮履兮不知所

繡鞋

羅裙習習春風輕蓮花帖帖秋水擎雙尖不露行復顧
猶恐人窺針線情縹雲隱映籠新月花影依稀襯香頰
彩鳳將翔相顧飛鴛鴦漫語愁丹裂落紅濕透胭脂膩
半幅凌波剪秋水莫教踏破浣溪沙濕重東風擡不起

燈蛾來

燈蛾勞燈蛾勞粉其面錦其袍繞燈不去千百遭忽然
性命輕鴻毛一鳥死百鳥號一獸死百獸嗥爾為微物
不自覺往來就死何滔滔燈雖滅燈復多蛾兮蛾兮奈
爾何

又

燈蛾來燈蛾來遶燈不去飛徘徊清光紅燄午夜開忽
然性命隨飛灰平生不傍太陽裏何故趨炎來就死人

生有情皆愛身何故將身為戲爾

飛奴

雌雄相對鳴鳴翅翎無異顏色殊營葉寄養出人力
安心飲啄還哺雛借問何修得如此世上羣禽那可比
不疑不詐已戀人自去自來人信已曉天空闊風日清
雕籠彩袖相齎擎得時可展青雲志回首無忘白屋情
蒼鷹繫緊鶴籠窄以身誤人穎愈力吁嗟此鳥得人憐
有性有情非一日

長門秋漏

上壺注水水縷明中壺激箭移銀星銅龍宛轉吐余毒
悶殺長門不寢人情雲心上如火色淚濤濕透銀蟾白
三百六旬尚可支二十五聲消不得何人夜扣相如扉
千金買賦成何遲男兒酒後多情思此意文君知不知
北人上塚

南人城南逢清明北人望北號哭聲人生何處問南北
春秋霜露俱含情天涯芳草何青青杜鵑口血花冥冥

酪漿一壺麥一飯香火照日藏流螢自言家住大河北
閩巔相望六十六血氣尋尋呼應聲音容皎皎常在目
虛名薄利非良圖故山松柏號夜孤兒身有祿親不待
親墳無主兒義辜低頭再拜襟盡血行路人情為慘切
紙灰低拂綠楊風盃漉澆殘沙上月人言朔客鐵心腸
誰無半餉情慘傷遊宦既知離別苦何如拂衣歸故鄉

枯荷

紅雲一夢何茫茫綠縈瘦骨擎欲僵愁多有魂弔秋水

故池日夜淒新霜鴛鴦相顧魂已泣白魚起身銀尺立
堂中書客感秋風一片青衫和淚濕

春別

花氣壓簾愁不掃細雨粼粼長芳草玉釵燕尾剪春寒
坐惜流年鏡中老東風吹柳人不知春嬌滿眼顰雙睂
吳松錦字夢中得曉來月落聞烏啼南園日暖蝴蝶醉
春霧熏人海棠睡朱門小立蹴金蓮落紅起作離人淚

南臺月

城南江上逢中秋城南石梁初截流長虹一道貫秋色
中分百里江南州殘露消盡魚尾黑金蛇翻動三江白
冰輪擁出碧玻璃照見釣龍臺上客臺中之客懷古心
黃河太華三登臨今年攜月醉臺畔越水越山為月吟
無諸城裏人如海無諸故塚埋殘靄無諸臺上草離離
龍去臺空三十載昔龍已去江悠悠今龍雖在人未求
懷珠豈立此臺下要上黃金臺上鉤乾坤四顧渺空闊
詩書亢氣行勃勃合沙古識此其時天下英雄求一決

南臺月照男兒面
豈照男兒心
與肝燕山買駿金萬斛
萬里西風一劒寒

征婦怨

有柳切勿栽長亭
有女切勿歸征人
長亭楊柳自春色
歲歲年年送行客
一朝羽檄風吹煙
征人遠戍居塞邊
辮辮車馬去如箭
錦衾繡枕難留戀
黃昏寂寞守長門
花落無心理針線
新愁暗恨人不知
欲語不語顰雙眉
妾身非無淚有淚空自垂
雲山烟水隔吳越
望君不見

心愁絕夢魂暗逐蝴蝶飛覺來羞對牕前月牕前月色
照人寒遲遲鐘鼓夜未闌燈闌有恨花不結粧臺塵慘
恨班班半生偶得一錦字道是前年戰時苦一朝血杵
煙數除腰間斜掛三珠虎妾心自喜還自驚門前忽聞
凱歌聲錦衣繡服歸故里不思昔日別離情別離之情
幾青草鏡裏容顏為君老黃金白璧買嬌娥洞房只道
新人好

春遊太真觀

東風惱人如著酒曉鶯啼斷門前柳青山忽然契我懷
飛上玄都弄星斗綠雲弄雨小立久幾片落花春在手
遼東白鶴胡不歸松下丹鉛老霜白


題二宮人琴壺圖

行雲留影雪弄香藕絲織翠芙蓉裳春風拂拂蘭蕙芳
金殿不鎖雙鴛鴦冰絃素手彈鳳凰玉壺投矢聲玎璫
花落無人春寂寂侍女空抱琵琶泣誰知絕代有佳人
不解傾城與傾國笙歌別院留春住嬋娟千古蛾眉妬

却笑長門閉阿嬌黃金好買相如賦

過桐廬

桐廬山水天下清洪濤拍岸山圍城桐君已乘丹鳳去
世間草木誰知情落日搖紅魚尾赤江上潮回沙嘴立
三三兩兩野人家半住漁村半樵牧盡拋章甫求仙靈
松間黃鶴喚不應阻風三日看山色平生慣識枯枝藤
碧桃海上開多少幾度春風長瑤草白雲滿地不歸來
石爛松枯天地老



雁門集卷一